

Месяца декабря в 17-й день
Святого священномученика Сергия Ракверскаго
Вечер

На Господи воззвах: стихиры, глас 2:

Приидите, православных людей множества, / песнями
вдохновенными почтим / Царства Небесного всельника, /
угодника Божия священномученика Сергия, / усердно к нему
взывающе: / радуйся страны Эстонския верное охранение, /
града Раквере и храма Пресвятыя Богородицы дивное
украшение // и всем христоименитым людям скорое
поможение.

Яко воина непобедима, / и пастырем изряднаго поборника, / и
подвижника благочестия искусна, / священномученика Сергия
приснопамятного в песнях достойно восхвалим: // той бо
мучителей посрами.

Иереи Божии / вкупе со архиереем и отцем своим /
полунощную песнь Богови во обители Пюхтицстей воспеша, /
града Везенберга достигоша, / мощи твоя тамо обретше, /
благодарственно воспевающе: // радуйся, священномучениче
Сергие, молитвенниче о душах наших.

Слава, глас 1:

Приидите, вси вернии, / восхвалим воинства царя земнаго
пастыря добраго, / Царя Христа воина / и к Нему за ны
молитвенника теплейша, // священномученика Сергия.

И ныне, Богородичен, глас тойже:

Радуйся, Богородице Дево, / горы Пюхтицкия и церкви
Эстонския похвало, / радуйся Пречистая Мати Божия, /
радуйся Благодатная, яко с Тобою Господь // и Тебе ради с
нами, Присноблаженная.

Вход. Прокимен дне. И чтения три священномученическая.

На литии стихиры святого, глас 5:

Днесь светло ликует Церковь Эстонская, / прославляя
священномученика своего, / и к нему усердно взывает: /
укрепи Православие в земли Балтийстей молитвами твоими / и
всем чтущим Тя скорбей и напастей избавление даруй // и
прощение прегрешений наших испроси.

О, преславный и святой угодниче Христов, / пастырю наш
Сергие, / ходатайством твоим у Господа нам, верным чадам
твоим, испроси / в вере Православней утверждение, / от ересей
и расколов сохранение // и душ от геены спасение.

Слава, глас 1:

Радуйся, граде Раквере, / и веселися о Господе, / ликуй и
торжествуй, Церковь Эстонская, / имущи в себе мощи
священномученика, / кровьюми своими землю нашу
освятившаго. / Звезде сей, от Суздаля нам возсиявшей, /
вернии, вси воззовем: / отче Сергие, / ты еси отечеству нашему
и Церкви утверждение // и всем православным спасение.

И ныне, Богородичен, глас тойже:

Радуйся, Богородице Чистая, / Двере Райская и Церкви
Похвало, / не остави людей от горы Пюхтицкия Тобою
благословенных, / во тьме неведения пребывающих, // и
просвети я светом Сына Твоего.

На стиховне стихиры, глас 6:

Возбранному Воеводе и Господу сил / воинство земное добре
приведшему / и по проповеди своея мученичества венец
доблестне приявшему, / священномученику пресвитеру
Сергию / приидите, вернии, поклонимся и воззовем: / радуйся,
священномучениче Сергие, // достоблаженный молитвениче о
душах наших.

Стих: Священницы Твоя облекутся в правду / и преподобнии
Твои возрадуются.

Пастырю наш добрый, / Богу и Церкви верен был еси даже до
смерти. / Темже, зряще тя с лики мучеников предстояща
Христу Царю, / любовию вопием Ти: / радуйся,
священномучениче Сергие, // достоблаженный молитвениче о
душах наших.

Стих: Честна пред Господем / смерть преподобных Его.

Иереев похвало и воинов радование, / приими пение чад твоих,
/ и молящим ти ся у Христа испроси / на диавола одоление, /
да ублажающе тя, присно вопием: / радуйся,
священномучениче Сергие, // достоблаженный молитвениче о
душах наших.

Слава, глас 4:

Радостию страдание за Христа претерпети изволил еси, / славо Церкви Эстонския, / ныне же со исповедники и новомученики Российскими молишия о нас / и слышиши всегда: // радуйся, священномучениче Сергие, достоблаженный молитвиниче о душах наших.

И ныне, Богородичен, глас тойже:

Призри на моления Твоих раб, Всенепорочная, / и всякия скорби и беды избави землю Эстонскую, / явлением Твоим и кровью мученик освященную. / Да не постыдимся, Владычице, Тя призывающии, / Ты бо еси нас, чад Церкви Русския, помощь, и покров // и священное прибежище.

Тропарь, глас 4:

Воинства царя земнаго пастырь добрый, / чада своя на подвиги ратныя укрепляя, / живот свой за други и отечество полагаши тех назидал еси. / Сам же во граде Везенберге даже до крове за имя Господне пострадавый, / и от Небеснаго Царя венец нетленный приявый, / священномучениче Сергие, // моли Христа Бога спастися душам нашим.

На утрени

На Бог Господь: тропарь священномученика дважды.

Слава и ныне, Богородичен.

По 1-м стихословии седален, глас 2:

Во бранех и трясениях смерти не вкусивый, / но и старческих
седин не достигнувый, / мудрость стяжал еси и венец приял еси
мученичества, / помози и нам Дома Отчего достигнути, //
мудре отревая от нас вся прилоги сопротивнаго.

Слава, и ныне, Богородичен, глас тойже:

Слова, из Тебе воплотившегося, познахом, / Мати Божия, /
Того моли о спасении всех, // во святем храме Твоем
священномученика Сергия воспевающих.

По 2-м стихословии седален, глас 2:

Добродетели твоя ведуще, / людие не убояшася безбожных
властей веления / и оставиша тя на месте служения твоего, //
да больных и уязвленных телом души исцелиши.

Слава, и ныне, Богородичен, глас тойже:

Пречистая Дево, / со священномучеником Сергием / и всем
собором святых Эстонския земли, / моли во святых Своих
почивающего Христа, / во еже спасти вся ны, // Тя
воспевающия во веки.

Величание:

Величаем тя, / священномучениче, отче наш Сергие, / и чтем
честная страдания Твоя, // яже за Христа претерпел еси.

Псалом избранный:

Крепость моя и пение мое Господь / и бысть мне во спасение.

По полиелеи седален, глас 6:

Явися ми милосерд, / яко чаду твоему духовну, / молитвою твоею святе Сергие, // ограждая мя от всякого падения греховнаго.

Слава, и ныне, Богородичен, глас тойже:

Богородице Дево Пречистая, / яже без семени рождши всех Творца, / Того со священномучеником Сергием умоли, / избавити и оградити мя // от всякого падения греховнаго.

Степенна 1-й антифон 4-го гласа.

Прокимен, глас 4: Возвеселится праведник о Господе, / и уповаает на Него. **Стих:** Господь просвещение мое, и Спаситель мой, кого убоюся.

Всякое дыхание: Евангелие от Иоанна, зачало 51.

По 50-м псалме стихира, глас 6:

Пастырю наш дивный, / богатырю духовный, / мужества и любви к Богу проповедание, / за всех неусыпный молитвенниче, / Сергие, священниче и мучениче, / Христу Богу со воины, на брани погибшими за землю родную, / в вечней радости предстоящий! / Молися с ними, с мученики и всеми святыми / и нам вечная благая уллучити, // и волю Отца Небесного на земли сотворити.

Каноны Богородицы, глас 8: Колесницегонителя фараона
погрузи... со ирмосом на 6, и святого на 8, глас 4.

Песнь 1

Ирмос: Моря чермную пучину / невлажными стопами /
древний пешешествовав Израиль, / крестообразныма
Моисеевыми руками // Амаликову силу в пустыни победил
есть.

Даждь ми слово, Слове Божий, / во отвержение уст моих, / и
уясни ми язык, Милостиве, / и не помяни грехов моих
множества, / да Твоею благодатию наставляем, // возмогу пети
священномученика Твоего Сергия.

Кровей теченьми, / мысленнаго фараона погрузил еси
всевоинство / и, яко святой Божий служитель, / вселился еси,
Сергие, / идеже множество мученик и священник // присно
веселится.

Никая изящная витийства довлеют, / во еже прославити Тя,
святые Сергие, / понеже из млада Христа возлюбил еси / и
непостыдно смерть и страдания // за Него претерпел еси.

Дивное чудо, / яко ты, православно Богородицу чтити всех
научивый, / днесь по прославлении твоём, / вкупе с Царицею
Небесною / и всеми святыми на небеси вечно царствуеши, / на
земли же во храме Рождества Владычицы // нетленно
почиваеши.

Богородичен: К Тебе усердно притекающе, / заступнице наша и
Мати, / мольбу смиренно приносим: / мир подаждь церкви

православней / и всем людем спасение испроси, // во граде
Нарве Одигидрии образ прославльшая.

Песнь 3

Ирмос: *Веселится о Тебе Церковь Твоя, Христе, зовущи: / Ты
моя крепость, Господи, // и прибежище и утверждение.*

О маловременней и тлеющей славе неберегл еси, / на земли
сущим оставив сию, / с воины пребываяй, / Божию любовию
уязвился еси, блаженне, / темже, яко воин Христов ныне
водворяешься, // идеже праведных селения.

Осужден быв, / за Христа пострадал еси, святе Сергие: / ныне
же осужденна мя суща прегрешеньми, / исцели молитвами
Твоими, // огорчившаго Господа паче всякаго человека.

Во убиении твоём дивно прославися имя твое, отче Сергие, / и
ныне собрася окрест мощей твоих новая чада твоя, //
ожидающе от тебе помощи и заступления.

Уведев твою даже до смерти любовь / Владыка Иисус восприят
тя / и дарова тя нам заступника граду и стране, / идеже
пострадал еси, / ихже сохраняй заступлением твоим присно, //
яко да ублажаем тя, отче наш Сергие.

Богородичен: *Бога преестественне зачала еси во чреве,
Пречистая, / и во граде Нарве честно почитающим Тя / икону
Твою от огня невредиму сохранила еси, / ныне, рождши,
пребываеши Приснодева, / и, запалением град наш наказавши,
// благочестная его Заступница.*

Седален, глас 8:

Яко преподобнаго избраннаго тезоименит и подражатель быв,
/ беды претерпел еси, отче, и искушения вражия. / Ревности
подражая пророка Илии, / мужески обличил еси безбожных. /
Яко милоть, тело твое на земли нам оставил еси / и, яко
благоухания аромат, изливаеши благодать духовную. / Сергие,
священниче и мучениче, / моли Христа Бога // грехов
оставление даровати чтущим любовью память святую твою.

Слава, и ныне, Богородичен:

Приидите, вернии вси, / поклонимся чудотворному образу
Божия Матере, / и к ней с любовью возопиим: / радуйся,
присно воспеваемая, / радуйся, явлением Своим гору
Пюхтицкую освятившая, / радуйся, обитель иноческую zde
преславно устроившая, / радуйся, источник воды живыя в той
открывшая. / Радуйся, Дево Чистая, / руце Свои милостивно к
нам простирающая.

Песнь 4

*Ирмос: Вознесена Тя видевши Церковь на Кресте, / Солнце
праведное, / ста в чине своем, / достойно взывающи: // слава
силе Твоей, Господи.*

Тя, священномучениче отче наш, песнословим, / радуйся, тебе,
Сергие, зовуще: // хранилище всех и ограждение и священное
прибежище.

Молитвенниче наш неусыпный, / Живоначальней Троице
вкупе с тобою чтимым всероссийским игуменом, / блаженным

аввою Сергием, / ныне предстояща, / молися с ним о всех нас,
// любовью сердцем и усты вас величающих.

Христу Иисусу, Агнцу Божию, служити хотя, / приял еси за
Него смерть поносну, / и, восходя от земных в Горняя, приял
еси венец мученичества, / настави же нас, отче Сергие, /
евангельски жительствовати и любити слово Божие, // да
внидем и мы в радость Господа своего.

Священномучениче Сергие, / не возгнушайся чада твоего
нерадения ради моего, / ниже отступи от мя, тяжких ради
беззаконий моих, / но милость от Создателя ми испроси,
молящуся: // Милостиве, помилуй мя падшаго.

Богородичен: Радости Божественныя мое сердце исполни, /
Радость и Спаса миру породившая, / во время же оно рекшая: //
о Бозе Спасе моем дух мой возрадовася.

Песнь 5

Ирмос: Ты, Господи мой, Свет / в мир пришел еси, / Свет
Святой, обращающий из мрачна неведения, // верую
воспевающая Тя.

Не служу демоном, ни устрашаюся смерти, ни мук различных,
/ — священномученик взываше Сергий, — / Сына, Отцу
Собезначальна и Духу, исповедую, / священник бо есмь, / и
Богу Слову пою: // на стези свидетельств Твоих, Христе,
утверди мене.

Посреде судища безбожных, святе Сергие, / радуясь,
воскликнул еси: // Господи Боже наш, слава Тебе!

Просветися лице Твое, / егда на судище беззаконных вину свою сам поставил еси, / рек: священник бо Божий аз есмь, // и сердце твое веселия о Господе исполнися.

Тебе, Господи мой, люблю / и, Тебе ища, мучения зрака не ужасаюся / — велиим гласом священномученик Сергей воспеваше, // егда на убиение его безбожнныя уготовляху.

Богородичен: Пред чудной иконой явления Твоего / великий пастырь кронштадтский молися, / и ныне обстоят ю чада церкви Эстонския, / просяще от Тебе, Богомати, // великия и богатыя милости.

Песнь 6

Ирмос: *Пожру Ти со гласом хваления, Господи, / Церковь вопиет Ти, / от бесовския крове очищися, / ради милости от ребр Твоих // истекшею Кровию.*

Да заградятся уста безбожных / мощей нетления убиеннаго священномученика доброты // не могуще зрети.

Да узрят мнозии страны нашея людии / молитвами Твоими, святе Сергие, / Свет Христов, просвещающий во тьме безбожия // и беззакония пребывающия.

Да наслаждаются вернии зарею всеобщаго воскресения, / Христа воскресшаго ведяще / и преславна угодника Его, священника и мученика Сергия, // нетленнаго плотию.

Да святится Имя Твое, / — тако в молитвах ко Отцу Небесному зывал еси, / ныне же, предстоя Ему, молися: / да сподобит и нас, чад твоих, // в животе своем Троицу Святую прославляти.

Богородичен: Да возрадуются вернии, / гору Пюхтицкую, аки Сион, возлюбившии, / уведевше Владычицу, / Сыновнему Престолу предстоящую / и мира во успении своем не оставляющую.

Кондак, глас 2:

Яко страдальца честнаго, / Царства Небеснаго всельника, / и пастыря доблестнаго, / достойно воспоим мученика иереа Сергия: / той бо духом и мощми с нами пребывая, / не престаёт светом жития своего // наставляти души наша.

Икос

Ангелов лики и люди земли Эстонския зело удивишася, зряще воинства царя земнаго пастыря добраго на судище, аки злодея безбожными ведомаго и того, яко истиннаго воина Царя Небеснаго даже до смерти непостыдное свидетельство. Тем же и мы, о подвиге твоём, святе Сергие, умиляющесе, зовем ти: Радуйся, воине Царя Царствующих: Радуйся, отче чадолюбивый притекающих к тебе. Радуйся, твёдая оградо духовным твоим овцам: Радуйся, украшение не Суздальския токмо, но и Эстонския земли. Радуйся, венец мученичества приявый и на небо преселивыйся: Радуйся, к лику иереев избранных тамо приобщивыйся. Радуйся, кормчий хотящих спастися: Радуйся, споборниче верным на врага рода человеческого. Радуйся, щите крепкий присно ны охраняй: Радуйся, мечу Божий неверие посекаяй. Радуйся, яко церковь

нашу неусыпно защищаеши: Радуйся, яко страну нашу, подвигом твоим освященную, присно покрываеши. Радуйся, священномучениче Сергие, достоблаженный молитвенниче о душах наших.

Песнь 7

Ирмос: *В пещи Авраамстии отроцы персидстей, / любовьию благочестия паче, / нежели пламенем, опаляеми, взываху: // благословен еси в храме славы Твоея, Господи.*

Любовию страстворився Христу, возлюбившему тя, / и Тому последовал еси, / даже до крови пострадав, // хвальный воспевая, Бог и препрославленный.

На гору, идеже облак мученик и священник / непрестанно веселится, возшел еси, / и, радуясь, спасения чашу приял еси // хвального отцев Бога и препрославленнаго.

С воины и чады твоими / на трясениях храняше тя Господь Иисус, / да венец мученический восприимеши / и небесная улучиши веселия, // хвальный отцев Бог и препрославленный.

Священства не отверглся еси, / дара Божия не посрамил, / вся безбожных устрашения оплевал еси, вопия: / ко Творцу моему пойду // хвальному отцев Богу и препрославленному.

Богородичен: **Научи** ны, Отроковице, смирению / Гавриилу смиренно рекшая: / се раба Господня, // хвального отцев Бога и препрославленнаго.

Песнь 8

Ирмос: Руце распростер Даниил, / львов зияния в рове затче,
/ огненную же силу угасиша, / добродетелию препоясавшися,
/ благочестия рачителие отроцы, взывающе: //
благословите, вся дела Господня, Господа.

Град почитаем Ракверский, / идеже Христос со Отцем и Духом
подвигом твоим, блаженне, прославися, / место, идеже
мужественное твое тело почивает в церкви Владычицы,
ублажаем / и Христа, давшего ти крепость таковую, // хваляще,
поем во веки.

Отче наш Сергие, / пресвитером украшение, / всем христианом
к Богу предстатель явился еси. / Не престай моляся о пастве
твоей, / священнолепно память твою совершающей, // да поем
Христа во вся веки.

Святе Сергие, / облагодати наш помысл, / еже звати нам, /
покрове, стено, и утверждение наше: // благословите вся дела
Господня Господа.

Яко подвигоположник Твой, / тако и ты претерпел еси смерть
поносную: / помози, отче молитвою своею нам /
пригвоздившемуся нас ради на древе / Христу сораспятися // и
жити с Ним во вся веки.

Богородичен: Не попущай, Пречистая, воле моей совершатися,
/ неудобна бо есть: / но утверди мя на камени воли Божия / и
сподоби с Сыном Твоим // жити во веки вся.

Песнь 9

Ирмос: Камень нерукосечный / от несекомыя горы Тебе, Дево,
/ краеугольный отсечеса, Христос, / совокупивый
разстоящаяся естества. // Тем веселящеса Тя, Богородице,
величаем.

Просвещаемый присно светом Божия благодати, / Сергие
славне и премудре, / победу нам от Бога на враги испроси / и
молися о чтущих твоя страдания, // яко да непрестанно тя
величаем.

Сергие священниче! / Воином наставниче и верным
защитниче, / не престай моляся за ны, / да тя воистину
сердцем и устнами // непрестанно величаем.

Не премолчи за ны ко Господу, святе и мучениче, / —
священницы вопиют ти, / — поминай присно и молися о
грешных земли, / издревле эстам Богом данней, / и о
преемницех твоего / на месте сем служения, // яко да
непрестанно тя величаем.

Исходатайствуй всем, / мощи твоя любовию лобызающим, /
вся потребная душам и телесем, / Сергие блаженне, // да тя
непрестанно величаем.

Богородичен: Церковь Эстонскую, / днесь священномученика
своего прославляющую, / во вся же дни вражия нападения и от
злых человек и / хитона церковнаго раздраания терпящую, /
Богомати, покрый, и от всякого зла ризою Твоею честною
защити, // яко да непрестанно Тя величаем.

Светилен

Собор Святых земли Эстонския / ныне радостно ликует, /
священника и мученика Сергия зря / Троице Святей // за ны
молящаяся.

Слава и ныне, Богородичен:

Милостивая Мати, Богородице, / Слова Божия красная Палато,
/ помози нам молитвами Твоими / Сына Твоего и Бога нашего
паче жизни возлюбити // и спасение улучити.

На хвалитех стихиры, глас 6:

Церкве предстателю Русския, / ея благое прозябение, / ветви ея
эстонския красный плод, / не презри ни единого от малых чад
ея / и выну Господа моли // спастися всем нам.

Проповедника мужества, / терпения и кротости зрим тя,
священномучениче отче наш Сергие / во всех озлоблениях,
яже творяху ти безбожнныя, / и непостыдней кончине твоей. /
Темже ти верно зовем: / сия добродетели и в нас возрасти / и
Троице Святей молитву вознеси // о спасении душ наших.

На судилищи безбожных предстоя, / мужески Христа
исповедал еси. / Помози и нам, святе Сергие, / в животе сем
Христа исповедати, // Его ради погубити и спасти души наша.

Слава, глас тойже:

Ты еси пастырь добрый, / священномучениче отче Сергие, / тя
всегда восхваляюще, сие вопием ти: / Тобою Бог украси
церковь Матери Своея, / и тело твое за Христа пострадавшее, /

многолетно же в земли сокровенное / верным возврати и люди
Твоя возвесели. / Темже моляся не престай о хвалящих и
чтущих память твою, // прося оставления грехов и спасения
душ наших.

И ныне, Богородичен, глас тойже:

Богородице, Ты еси лоза истинная, / возрадившая нам плод
живота, / Тебе молимся: молися, Владычице, со святыми
апостолы, // помиловати души наша.

Славословие великое и прочее по уставу.

На Литургии:

Блаженны, песнь 3 на 4 и песнь 6 на 4.
Прокимен, глас 7: Честна пред Господом / смерть преподобных
Его. Стих: Что воздам Господеву о всех, яже воздаде ми?
Апостол дне и святого, к Римляном, зачало 99.
Аллилуиа, глас 2: Священницы Твои облекутся в правду и
преподобнии Твои возрадуются. Стих: Блажен муж, бояйся
Господа, в заповедех Его восхощет зело.
Евангелие дне и святого, от Луки, зачало 106. Конец: В терпении
вашем стяжите души ваша.
Причастен: В память вечную будет праведник: